

**Regional News Unit AIR Aizawl
Friday, July 12, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Mizoram Legislative Assembly Session thutkhawm vawi 3-na chu August thla ni 20 atangin an thukhawm ang.**
- **Union Home Minister Pu Amit Shah chuan Assam Rifle sawn chhuahna tur MOU tih khawtlai chu hapta khat chhunga tihfel a tum thu Chief Minister Pu Lalduhoma a hrilh.**
- **External Affairs Minister chuan nimin khan BIMSTEC Foreign Ministers' Retreat karlakah ramdang hruaitute a kawm.**
- **Union Health Minister JP Nadda chuan nimin khan World Population Day pualin Family Planning leh Population Control chungchangah state leh UT hruaitute internet kaltlangin a thutkhawm pui.**

<><><>

SESSION

Mizoram Legislative Assembly Session thutkhawm vawi 3-na chu August thla ni 20 atangin an thukhawm ang.

Session kohna hi Governor Dr Hari Babu Kambhampati a chuan tichhuakin, August ni 20 chawhma dar 10.30 ah tan tur a ni a, session chhunga tihtur kimchang hi Speaker hova Business Advisory Committee thukhawmin an la rel ang.

<><><>

RD MINISTER

Rural Development Minister Prof. Lalnilawma chuan Mipuiten Rural Development Department awlsam zawka an dawr theih nan leh hmasawna hna sawt zawka kalpui a nih theih nan RMIS chu tangkai tak a hmang a tul a ni, a ti.

He thu hi niminna North Eastern Council hnuai Rural Monitoring & Information System (RMIS) kalpuina tur Computer set leh hmanraw dangte semna hun Rural Development Conference Hall, Aizawl a hun a hmanpuinaah sawiin Prof Lalnilawma chuan Rural Development Department chu thingtlang khawsak dinmun chawikan leh tihhmasawn hna thawktu an nih thu a sawi a. Mizorama khaw hrang hranga harsatna awmte zirchiang turin an awm kual tam a pawimawh thu a sawi bawk.

He hun hi Rural Development Department Director Pu K.Lalrohlua chuan a kaihruai a. Minister Prof. Lalnilawma chuan RMIS kalpuina tur bungruate RD Secretariat, Directorate of RD, DRDO Office 11 leh RD Block Office 28 aiawh a lo kalte hnenah hlanna hun a nei nghal a.

NEC Scheme hnuaiia RMIS Project hian RD Secretariat, Directorate of RD, DRDO Office 11 leh RD Block Office 28 te tan Computer 55 leh a kaihnawih hmanrua dang te, Software Development-te, Server System-te leh Project atana Skill Development Training a huam a, he project hi cheng nuai 249 hu niin NEC atangin 1st leh 2nd Installment atan cheng nuai 200 hmuh tawh a ni.



UNION HOME MINISTER

Union Home Minister Pu Amit Shah chuan nimin khan Chief Minister Pu Lalduhoma chu telephone a biaiin Assam Rifle sawn chhuahna tur Memorandum of Understanding, hun engemaw chen Home Ministry in an kawl tawh chu hapta khat chhunga tihfel a tum thu a rawn hrilh.

Tun hnaia Chief Minister Delhi zin lai khan Union Home Minister hi a zin chhuah lai a lo nih ve avangin an inhmu hman lova. Chuvang chuan lehkhain Cyclone Remal chhawmdawlina te, Raltlan chhawmdawlina te leh Assam Rifle sawnchhuah thute hi Home Minister-ah hian a theh lut a. Union Home Minister hian heng lehkhah te a hmuh ve leh Chief Minister hi a rawn be nghal a ni.

Remal chhawmdawlina leh raltlan tanpuina te hi an rawn pe chhuak dawn tih a a sawi a. Assam Rifle sawnchhuahna tura Mizoram sawrkar, Assam Rifle leh Central sawrkar te inremna Memorandum of Understanding, hun engemawchen Home Ministry in an kawl tawh chu tun dinhmuna mutan nia a ngaih thu Chief Minister hian a lo sawi a. Union Home Minister Pu Amit Shah hian kar khat chhunga he MoU hi lo chin fel a tum tur thu a hrilh a ni.



UNION MINISTER

Union Minister of State for Minority Affairs, George Kurian-a'n hmarchhak hmasawna chu sorkar laipui ngaih pawimawh ber a ni, a ti.

He thu hi nimina BJP Mizoram State Press Conference Room, Aizawl-a chanchinbumite a kawmnaah sawiin Pu George Kurian-a chuan, hmarchhak state-a hnam tlêm zawkte tan PMJVK hnuaiiah hmasawna ruhrel din hna thawh mek a ni a, thawh zawh tawh pawh eng emaw zat a awm, a ti a. PMJVK hmang hian zirna in leh damdawi in-ah te hmasawna hna thawh a nih tur tur thu a sawi a. Manav Sampada programme pawh Prime Minister Narendra Modi-a kaihruaina hnuaiiah tan a nih tawh thu a sawi a. Hemi hnuaiiah hian mipuite'n hamthatna an dawng thei, a ti.

Union Minister hian Vawk pul hri leng mek ASF chungchang pawh sawiin, ASF laka inven dan a awm, a ti a. Zangnadawmna a awm thu pawh sawiin a tuartute chu sorkarah an zualko a ngai a; Sorkar hnena report hmasa lova an lo suat thin avangin buaina a awm thin a, hmalak a harsa thin, a ti a.

Vawk te chu suat an nih hmaa sorkar an hrilh ngei a nih chuan zangnadawmna an dawn tur thu a sawi a ni.

<><><>

SERCHHIP

Serchhipah dan kalha hnathawka naupang chhawr luih a awm leh awm loh nimin khan enfiah a ni a,

Serchhip DC kaihhrainaa din District Task Force on Child and Adolescent Labour chuan nimin khan Serchhip khawpui chung hmun hrang hrang tlawhin dan kalha naupang chhawr luih - child labour a awm leh awm loh an enfiah a. Zing dar 10:30 khan an Chairperson Pu Paul L.Khuma, Serchhip DC chuan Serchhip DC Office tualzawl atangin fehchhuak te hi a vailiam a ni.

He Task Force-ah hian police te leh sawrkar department hrang hrang official te bakah tlawmngai pawl hruaitute an tel a. Kalchhuak zingah hian Serchhip Sub Headquarters YMA hruaitute, police te, I&PR te leh Serchhip District Child Protection Officer leh a staff te an tel a ni. New Serchhip area atanga bul tanin kawngpui dunga dawr te, thingpui dawr te, hotel te, workshop te an tlawh chhuak a. Heng hmunah te hian naupang kum tling lo hnathawka chhawr an awm em tih an enfiah a ni.

Kum tling lo naupang/teirawl hnathawka chhawr Child and Adolescent Labour leh Child Trafficking chungchang inzirtirna Sensitization Workshop hi July ni 9, 2024 khan Serchhip DC Pu Paul L.Khuma hovin Serchhip DC Conference Hall ah neih a lo ni tawh a. He hunah hian Serchhip DCPO Pi Lalsiampuii leh Pu Lalrinhlua, Advocate ten Child and Adolescent Labour leh Child Trafficking chungchang zirtirna an pe a. He hunah hian sumdawng te, bazar nuho te leh a kaihhnawih dang te sawm an ni.

Vawiin hian District Task Force on Child and Adolescent Labour te hi a tum hnihna atan an thawk chhuak leh dawn a ni.

<><><>

BILKHAWTHLIR

Bilkhawthlir North VC Conference Hall-ah Agriculture Department hotute chuan Bilkhawthlira leilet neitute kawm in, Mizoram sorkar-in man man zawka Buh lei a tum chungchang in hrilhhriatna leh sawihona hun an buatsaih.

He hun hi Pu Malsawmdawngkima, Block Agriculture Officer, Bilkhawthlir chuan kaihhruai in, Pu George Lalthanngura, Joint Director, Agriculture Department chuan thusawiin, sorkarin man man zawka loneitute Buh thar lei a tum thu a sawi a, hemi atan hian sorkar chuan Kolasib leh Mamit District ah hmalak a tum tih sawiin, hemi chungchang hi kuthnathawktute hnenah in hrilhhriatna kalpui mek anih thu a sawi a. Mizorama leilet kan neih ah tun aia hlawk zawka Buh a thar theih dan a awm em, tih ngaihtuah ho tura in kokhawm an nih thu Jt Director chuan a sawi.

Agriculture Department Dy Director, Dr. David Fangzauva, pawhin thusawiin, sorkar in Hand Holding Policy pakhat atana a kalpui mek Buh-a intodelhna atan loneitute Buh thar a lei let sak dawn tih sawiin, sorkarin State pawn atangin sum tam tak sengin Buh a lei reng tho avangin sum seng hnem deuh zawk dawn mahse sorkar chuan Mizo Buh thar ngei lei sak tha a tih thu leh Buh hi Kg khat Cheng 30 aia tlawm lovin sorkarin a lei dawn avangin kuthnathawktute tan pawh thawh hah man a awm dawn ni a a hriat thu a sawi a. Hetianga Buh hralhna rate a that chuan Leilet ah hnamdang chhawr lovin a neitute ngei pawhin Leilet ah hna an thawk duh ngeia a rin thu a sawi bawk.

Pu R. Lalremruata, DPM, FOCUS, Kolasib chuan FOCUS chu Agriculture deptt hnuaiia peng pakhat a nih thu sawiin, Buh lei chungchangah Collection Centre siam a ni ang, tiin, chutah chuan hralh in, Rice Mill ah her fai a nih hnuah mipuia hralh chhuah a ni ang, a ti.



BIMSTEC

External Affairs Minister chuan nimin khan BIMSTEC Foreign Ministers' Retreat karlakah ramdang hruaitute a kawm a. Thailand leh Myanmar Foreign Minister te nen ram pathum inkar sawihoin an inkawm a. BIMSTEC hmalam huna inkalpawhna tur hmachhawp te sawihoin ramri himna leh mihring chhawmdawlana lama an ngaihdante an sawiho a ni.

Dr. Jhaishankar-a hian Bhutan Foreign Minister DN Dhuyngei pawh biain India leh Bhutan inthianthatna chu sang zawk thlenpui dan tur an sawidun a ni.

Hei bakah hian Nepal Foreign Secretary Sewa Lamsal nen India-Nepal thawhdunna hrang hrang tihhmawsawn dan tur an sawidun a. Sri Lanka Minister of state for Foreign Affairs Tharaka Balasur ne India leh Sri Lanka inkara thil pawimawhte an sawidun bawk a ni.

Nimin khan Bay of Bengal Initiative for Multi-sectoral Technical and Economic Cooperation (BIMSTEC) Foreign Ministers' Retreat wawi hnihna chu New Delhi ah tan a ni a External Affairs Minister chuan lawmna thusawiin an inhmuhkhawmna chuan BIMSTEC te thawhhonaah phurna thar, bungrua leh inpekna thar a siam a beisei a ti a. An retreat hmasak lamah hian inbiakpawhna lamte, institution siamna lamte, sumdawna lawma thawhhona, hriselna leh space lamte, digitap public infrastructure, capacity building te chu an ngaihtuah tur a ni a ti bawk.

Dr. Jaishankar-a chuan khawvel puma thilthleng leh an chhehvela thilthleng hrang hranga chinfel ngai tam tak a awm tih a sawi a. Hmachhawp lian tak tak an hmaah tihhlawhtlin tur an neih thu a sawi bawk a ni.



FAMILY PLANNING

Union Health Minister JP Nadda chuan nimin khan World Population Day pualin Family Planning leh Population Control chungchangah state leh UT hruaitute internet kaltlangin a thutkhawm pui a. He hunah hian Pu Nadda chuan sawrkar laipui leh state sawrkar te chu family planning tha a awm theih nan te, scheme te tha taka tihhlawhtlin a nih theih nan te an thawhho a tul thu a sawi a. Pu Nadda chuan state, district leh block hnufual bikahte tan lak zual a ngai a tih thu a sawi bawk a ni.

**Pu Nadda hian family planning atana inzirtirna tur Famliy Planning
Display Model "Sugam" a tlang zarh bawk a ni.**

